



大清渠錄

序

大清渠錄曷錄乎爾蓋錄予所作之書與記並錄諸公所贈之詩與文也客曰斯錄也不亦近於德政頌而貽自譽之譏乎予應之曰民以食爲天而寧渠又天之天也我皇上軫念民依至諄且切凡地方利弊莫不上厪睿慮士君子身膺外吏職司民社我

皇上卽以此一方利弊委任之有可興之利應除之弊而不悉心興除是自負職司卽大負

簡畀之至意矣予抵寧夏任見各渠濱於廢棄竭力修濬亦祇期無負職司云爾乃寧夏士民以予所作書與記勒之於

石而遊覽諸公咸贈以詩文夫子所作書與記既爲士民  
勒諸石矣而諸公所贈不集諸簡端公之世好使明月之  
珠淪於瓦礫連城之壁掩於榛莽奚可哉然則予之區區  
錄此者蓋錄諸公所贈之詩與文而連類以及不能不兼  
錄予之書與記也客曰有是哉不伐善更不沒人之善於  
斯錄而兼有焉爰敘次本末以付剞劂至所錄開渠建閘  
迎水暗洞諸詩予亦妄有所作嫫母捧心里人却走貌其  
美而愈形其媿予亦有所不顧也楚郢王全臣書  
康熙五十一年壬辰孟冬之吉

大清渠錄總目

序一

書一

弁言一

書後一

記一

詩七十二首

大清渠錄

寧夏士民公刊上舒撫軍渠務書序

唐漢兩渠並利吾寧者也自河勢東徙唐渠不能受  
水則唐病唐病則借潤於漢渠漢亦因與之俱病官  
斯土者議濬議開輒行輒止優柔數十年而卒不能  
挽河流東徙之勢戊子春王公來守吾寧下車之初  
卽殷殷以渠務爲念日往來於唐漢之間環顧周視  
亦若一無有爲者秋九月忽集紳士耆庶而告之曰  
百塔之濱河底有石是可泮也泮之兩渠之間河勢

向西是可渠也渠之時驚異者半阻撓者亦半然皆謂其事之未能必成也公乃偕司水王公請命於觀察使鞠公陬吉動土開渠數十里延袤乎九堡會歸於唐來不費不勞七日而工竣開水之日老幼聚觀河水建瓴而至咸稱以爲神越己丑公復於新渠之上修閘建壩一如唐漢之式而更厥焉號曰大清閘漢則濬之使深唐則疏之使通而唐之口更築湃數百丈挽彼東徙者西折而入比年三渠交流大田多稼我寧民欲紀其事而頌公之功也愧筆儉墨嗇乏

昌黎之才也竊見公所上舒撫軍書其間規爲籌畫撥夫派工之事革弊剔奸之舉纖悉俱備因舉而壽之於石後之覽者於此書可以知公之才可以見公之心而我寧民壽之於石之意則欲司水利者讀其文究其理因而恪守其法以惠我寧民於千百世固非徒頌公之功已也若頌公之功則閘壩亭亭河流滾滾直與唐漢互峙又何俟人之覩縷也哉康熙庚寅春月西夏蔣承爵謹序

上舒撫軍渠務書

康熙四十九年二月初四日寧夏監收管理本鎮倉  
塲兼攝理刑屯田慶陽府同知加二級紀錄四次王  
全臣謹上書大憲臺閣下竊惟寧夏唐漢兩渠乃民  
命攸關四十八年正月內蒙憲臺以職全爲能留心  
渠務者諭誠水利都司王應龍盡力春工而令職全  
贊理其事幸仰藉洪庥各渠皆已疏通水行無阻數  
十年不得涓滴之區今皆挹注任意是已覩厥成效  
矣然皆分所當爲力所能爲初無奇策異術裨益地

方乃蒙謬加獎藉復以各渠情形及修濬利弊殷殷  
下詢誠痾瘼民生體察未察之至意也茲謹爲憲臺  
詳陳之寧夏古朔方也黃河遶於東賀蘭峙於西相  
距或四五十里或八九十里遠者亦不過百餘里南  
自唐壩堡之分守嶺北至威鎮堡之邊墻僅二百七  
十五里延袤不甚寬廣而中間所屬寧夏衛并左右  
二衛及平羅所共轄五十二堡約計田地九千八百  
二十九頃有餘其正供除外民納銀五百五十兩八  
錢身差納銀六百七十一兩九錢公用納銀六百八

十兩九分麥饌納銀七百五十兩外田土之賦計納  
糧九萬八千三百八十九石零納七斤谷草并年例  
秋青草共三十八萬三百二十一束零納壩草六十  
一萬零納地畝銀八百六十二兩七錢五分零其湖  
灘又納潮灘銀一千五百九十兩八錢六分零以幅  
帛若彼以徵輸若此賦亦綦重矣况地土大半盡屬  
沙灘必得河水乃潤必得濁泥乃沃古人於黃河西  
畔開濬唐漢兩渠誠萬世之利也四十七年春職全  
蒞任之時值春工方興雖專司水利有員而職全有



查點夫役之責遂隨道憲鞠親詣各渠細爲勘驗竊查黃河自南而北其入寧夏之處兩岍俱係石山名曰峽口河初向東北流入峽微折注於西北不一二里卽仍向東北出峽峽之盡處有一觀音堂古人於此傍石山之麓開唐渠一道渠口寬十八丈深七尺至先明寧夏道汪公諱文輝者於右衛之唐壩堡地方距渠口二十里建石正閘一座閘之外建石退水閘四座正閘下入渠之水以五寸爲一分止以十分爲率水小則閉塞退水各閘使水入渠水大則開退

水以洩其勢其正閘係六空西四空爲唐渠東兩空爲貼渠每空各寬一丈唐渠自閘以下西北至玉泉橋名曰上上段寬八丈深三五尺長五十里自玉泉橋向東北流復微轉西至良田渠口名曰上段寬七丈深五六尺長七十里自良田渠口西北至西門橋名曰上中段寬六丈深七尺長四十里自西門橋西北至站馬橋名曰下中段寬六丈深七尺長六十里自站馬橋北至威鎮堡稍止名曰下段寬三丈深三四尺長一百三里五分合計共長三百二十三里五

分其貼渠一道寬三丈五尺深六尺至郭家寺地方  
分爲兩稍一至漢壩堡地方稍止長四十里名曰舊  
貼渠一至蔣鼎堡地方稍止長五十里名曰新貼渠  
此因唐渠正閘之東岸地土甚高故別引此渠雖開  
分兩派而實與唐渠同口蓋唐渠之附庸也渠兩岸  
之堤及堵水之壩俱名曰泮俗音擺沿泮居民挖小渠  
以引水入田名曰枝渠大者或百餘里小者或數十  
里及七八里不一各於泮上建小木閘以便蓄洩名  
曰陡口唐渠東西兩岸共陡口四百三十六道舊例

百姓有田一分者歲出夫一名計力役三十日又納

草一分計四十八束每束重十六斤又納柳椿十五

根每根長三尺此輸將定額也其或須用紅柳白茨

芎苢

音夕吉卽  
席箕從俗

則於草內折收每草一分或折紅柳

四十八束每束重七斤或折白茨四十八束每束重  
七斤或折芎苢四十八束每束重七斤總名曰顏料

或須用石灰亦於草內折銀燒造每草一束折銀一

分其草曰壩草以備於險要處和土築泮及啓閉各

閘堵疊渠口也椿曰沙椿或釘閘虛或釘泮岸使土

堅固也渠內水衝之處必用土草築一墩以逼水而外用紅柳白茨護之更釘以沙椿名曰馬頭芟苦則繩纜之具也或修理閘庑亦必用紅柳白茨鋪墊而以沙椿釘之乃蓋以石條使無冲動之患也每歲冬餘河凍之時將渠口用草閉塞名曰捲埽至清明日派撥額設夫役赴渠挑濬文武各官分段督催以一月爲期名曰春工至立夏日掣去所捲之埽放水入渠名曰開水開水之後田地正須澆灌其法先委官閉塞上流各陡口以逼水至稍其名曰封封之之際

各陡口仍酌量留水一二分其名曰淩

卽俵從俗

迨水已

至稍乃開上流各陡口任其澆灌澆灌旣足又逼令至稍封與淩周而復始上流下稍皆須澆灌及時也唐渠貼渠原灌寧左右三衛及平羅所共三十四堡田地六千二頃有餘衛所各官分段封淩一歲須輪灌數次乃獲豐收至於漢渠在唐渠之下左衛陳俊堡四道河口地方距唐渠口三十里地形低窪直迎河流水勢易入其渠口寬三十一丈深七尺五寸先明寧夏道汪距渠口十二里於漢壩堡地方建石正

七  
開一座計四空。空寬一丈。閘外建石退水閘三座。自正閘北至唐鐸橋名曰上段。寬五丈。深六七尺。長六十五里。自唐鐸橋西北至張政橋名曰中段。寬四丈。五尺。深六七尺。長七十五里。自張政橋北至殷家夾道。稍止。名曰下段。寬三丈。深五六尺。稍末寬一丈。長九十八里。共長二百三十八里。渠之東西兩岸共陡口三百六十九道。原灌漑寧左右三衛所屬十八堡田地共三千八百二十七頃。有餘。後因開導西河水勢變遷。何忠堡竟隔在河中。各自開引小渠灌田。

三十餘頃。今漢渠止灌漑十七堡田地共三千七百九十七頃。有餘。其挑挖封淤與唐渠一例。此渠得水甚易。而又稍短。田少。所以通利如故。比年以來。惟唐渠淤塞過甚。濱於廢棄。居民雖紛紛借助於漢渠。不過稍分餘瀝。地之高者。竟屢年荒蕪。而漢渠反因以受困。職全細按唐渠之大病有三。一苦於渠口之不能受水也。相傳先年唐渠口下河中有一石子沙灘。障水之勢。以入渠。厥後灘漸消沒。河流偏注於東。而渠口竟與河相背。其入渠者。不過旁溢之水。耳水之

入渠也無力遂往往有澄淤之患一苦於地渠之不能通水也唐壩以下自杜家嘴至玉泉營盡係淤沙每大風起輒行堆積唐渠經由於此實爲咽喉向者以風沙之積也無堂而去之實難遂相與名曰地渠蓋因兩岸無泮與平地等故名之云爾也此處自來不在挑濬之列因循旣久竟致渠底與兩岸田地齊平甚有渠底高於兩岸田地者較唐壩閘底約高三四尺河水泛漲時入渠之水非不有餘乃自入閘以來至此阻梗由是旁灌月牙倒沙兩湖迨兩湖旣滿

然後溢於渠內徐徐前行不知費幾許水力經幾許時日乃得過玉泉橋也况有此阻梗水勢紆迴水未前行而挾入之濁泥已淤積閘底數尺矣一苦於渠身之過遠也水之入口者原自無多而又苦於咽喉之不利以有限之水流三百餘里供數百陡口之分洩其勢自難以遍給若遇河水減落則束手無策矣唐渠有此三大病而又加以年年挑濬之法積弊多端如渠夫渠草除紳衿優免外豪衿地棍及奸胥猾吏肆意侵蝕每將百姓應納草束沙椿折收銀錢代

爲買備輸納名曰包納草則多係朽爛椿則盡屬短小又巧立名色隱射規避若橋梁若陡口倘有損壞俱屬官修乃藉稱須人看守每處免夫草一二分名曰看丁又曰坐免甚至徒杠亦有坐免有力盡爲看丁卽曰陡口須人啓閉未聞天下橋梁俱須設人看守也是渠夫渠草祇爲奸積之利窟而渠工已受病實多矣每年興工之時並不查明某處淤塞某處阻梗量度工程之輕重酌用夫役之多寡唐渠自口至稍止分三工五段漢渠自口至稍止分兩工三段如

某工舊例用夫五百名年年撥給五百某段舊例用夫三百名年年撥給三百工輕之處夫多怠玩工重之處夫實短少且催納顏料之役必故爲遲延及時至工迫各段督工者卽令挑渠之夫役採取顏料兩畝園林庄柳任其砍伐徵論止半供渠工半充私橐額徵顏料盡被乾沒而所撥三百五百之夫亦止虛有其數而已渠道灣曲之處東畝高者西必低西畝厚者東必薄以高厚者力逼水勢澗洗對畝也每年挑濬之法如用夫一百名止有三四十名在渠內取

土餘五六十名俱排列高厚岍上遞相轉運一畝之  
土經七八人之手而對面低薄之岍必不肯加幫尺  
寸謂低薄岍底必有洶洗深溝恐因加幫撒土填塞  
以致高厚者愈增低薄者愈減是以每年有冲崩之  
虞水由泮底鑽潰其名曰未水由泮上漫倒其名曰  
空空卽漫也未卽鑽去聲也二字無所考據文報率皆  
用之或未或空皆不肯加幫低薄所致也至渠夫則  
止由衛所經承派撥賄囑者派之路近而工輕貧窮  
者派之路遠而工重名曰安渠且將一段之夫雜派

數十堡之人聽其自赴工所管工者莫知誰何中有  
逃者報官查冊拘提往返動至半月而一堡之夫又  
分派數處必遠至百里或二百里以外使之奔走不  
遑更將撥夫單內故意填寫錯亂使之赴各工段自  
行查問總欲令民不得不致遲悞以便定取罰工又  
各工段設立委管渠長等役各五六人或七八人每  
人免渠一二分彼俱係用賄鑽營充當者一到工所  
每名包折夫役十數名或二十名不等更有豪矜地  
棍指稱旁枝小渠請討人夫或二三十名或五六十

名官必如數撥給實無一名赴彼所請之處伊等盡折錢分肥是以額夫雖一萬一千有零其在渠挑濬者不過五六千人而此五六千人又半係老弱率多怠玩官司查渠止走大路沿途問夫在何處就彼查點委管渠長人等每日設人偵探預知官司到來卽僱覓附近庄農充數點後卽散甚且預知官司到來令人夫於渠內挖土堆積如塔形以堆土之高詐爲挑挖之深使高低莫辨官司一見便誇稱工好並不問及上段如何下段如何官司去後夫役仍將所堆

之土攤平渠內其運上高岍者不過數十畝八段之內官司必由之處或挑挖數里其僻遠不到之處亦夫役足跡之所不到也總因兩渠分爲八段每段必遠至數十里無一定之責成無一定之程式而奸棍又折去夫役因循延至一月遂相率而散其未經挑挖者雖有十之六七祇謂工多夫少付之無可如何渠道之淤塞實由於此職全於蒞任之初巡視渠工竊見漢渠口之上有一小渠名曰賀蘭渠寬數尺長十餘里乃前任寧夏道管據居民所請開濬者別引



黃河之水灌田數頃職全上下查驗見河水直冲渠口而第苦於口低身小導引不得其方莫能遠達乃謀諸司水王應龍請命於道憲鞠欲借此渠形勢另開一渠以助唐渠水力之所不逮道憲謂此渠曾奉前撫憲齊據士庶呈請飭委惠安堡鹽捕廳王惠民勘驗形勢甚有裨益後以工程浩大約計役額夫萬餘一月尚不能開又慮修理閘壩需費不貲遂爾中止吾有志久矣汝其力行之職全謂用夫不得其法雖數里亦覺艱鉅若量土以計工量工以派夫此數

十里之渠計日可成渠若告成閘壩自易易也道憲乃令職全與都司役用額夫距舊賀蘭渠口之上三里許直迎水勢另開一口至馬家庄地方引入舊渠而擴之使寬行三四里至陳俊漢壩兩堡之交卽棄舊渠而西引水由高處行以達於唐渠雖遠至數十里而莊園坵墓皆繞以避之毫無所傷其所損田畝盡爲除厥差徭居民莫不懽忻樂從於四十七年九月初七日興工至十三日渠成十五日道憲親詣渠口開水不崇朝而徧注田間自來高亢之地一旦水

盈阡陌婦女孩童咸出聚觀驚喜之狀若出意外之  
獲其渠口上距唐渠口二十五里下距漢渠口五里  
乃右衛唐壩堡所屬剛家嘴地方口寬八丈深五尺  
渠身長七十五里二分上三十里寬四丈深六七尺  
下三十里寬三丈五尺深五六尺稍末十五里二分  
寬一丈六尺深五尺東西共陡口一百六十七道灌  
溉陳俊蔣鼎漢壩林臯瞿靖邵剛玉泉李俊宋澄九  
堡田地共一千一百二十三頃有餘至宋澄堡地方  
仍滙入唐渠道憲見此渠閱數十年聚議止爲道旁

之築者今乃告成於七日之內且相度形勢較鹽捕  
廳向所勘驗引水更易不覺喜形於色謂移此用夫  
之法以修唐漢兩渠不難坐令各渠疏通也於是於  
四十八年竟以此渠聞之憲臺當蒙倡捐俸貲於陳  
俊堡地方建石正閘一座計兩空每空寬一丈閘外  
建石退水閘三座工旣成蒙命其閘曰大清閘渠曰  
大清渠職全復於閘上建橋房五間左側建遊亭一  
所其規模竟與漢唐兩壩鼎峙云此建閘之處乃舊  
貼渠經由之地貼渠較清渠高六尺有餘竟爲清渠

截斷職全乃造木笕置諸閘後兩旁石墻之上中更用大木架之傍橋房之欄以渡貼渠之水自西而東笕寬四尺長三丈名曰過水此不特貼渠無傷而閘上閘下水流交錯波聲互應風景實大有可觀也彼陳俊等九堡田地乃素用唐渠之水者大清渠旣成則不須唐渠灌溉其入唐渠之水可使之直趨而下而所省灌溉九堡之水實足以補唐渠水利之不足不患渠身之過遠矣况大清渠之餘水滙入唐渠者又能大助其勢耶唐渠之病去其一至於唐渠口則

於黃河內築迎水湃一道用柳固數千內貯石子排列兩行中間用石塊柴草填塞上復用石草加疊過於水面更用大石塊襯其根基其湃寬一二丈高一丈六七尺不等白觀音堂起至石灰窰止共長四百五十餘丈逆流而上直入峽內中劈黃河五分之一以爲渠口口寬至二十餘丈較舊渠口約高數尺挽河流東注之勢逼令西折入渠是迎水湃之力已能逆水使之高束水使之急吞噬洪流勢若建瓴不患澄淤矣而口又加寬受水實多渠內之水賴以倍增

唐渠之病又去其一歷年不挑之地渠則多用夫役挑濬使之低於閘底以通水路兩旁復立高厚湃岸使渠流至此得以疾趨不致遶道於湖水行旣疾則沙隨水走莫能淤積唐渠之病又去其一由是口內洋溢咽喉無阻向之唐渠以有限之水灌溉三十四堡田地共六千二頃有餘常慮不足者今以有餘之水又省九堡之分洩止灌溉二十五堡田地四千八百七十九頃有餘自無不餘裕矣不須借助於漢渠而漢渠遂獨專其利矣至若奉委協助都司挑濬各

渠則革盡從前積弊惟遵道憲之明訓以開大清渠用夫之法爲例於清明興工前一月將漢唐各渠自口至稍逐細查丈更用水平量其高佷如某處渠道淤塞應挖深若干寬若干某處湃岸低薄應築高若干厚若干某處工重應用夫若干某處工輕應用夫若干預爲造一工程細冊乃以額夫合算除修理閘壩迎水及各大枝渠用夫若干外計挑挖唐漢大清各渠實止夫若干於是量土派夫每夫一日以挖方一丈深三尺爲率夫數旣定乃自下而上挨堡順序

如威鎮堡在唐渠之稍該堡額夫若干名以土合算應挖若干里卽定以里數分立界限開明寬深丈尺令從稍末挖起至分界處接連卽用平羅堡之夫又接連卽用周澄堡之夫餘俱逐堡順派以近就近各照分定界限挑挖其夫卽用本堡堡長督率每工開一丈尺細單務令挑挖如式挑挖之土俱令加疊低薄泮岍高厚之處不許妄排多人致妨正工其枝渠之大者俱量度工程撥給夫役但往歲於各堡夫中混撥今則止令受水之民自行挑挖夫數或稍減於

舊額而用工則不啻數倍至十餘里及三五里之小枝渠卽算入正渠工程之內一併挑濬不另撥夫役以杜隱射包折之弊職全復每日於渠身內往返巡查如某堡分工幾里其挑挖不合單開丈尺致渠底不平或低薄之岍築疊不堅卽責究堡長工程無包折之弊夫役無遠涉之勞而逐段皆有責成皆有程式自相率盡力不敢怠玩况興工之後復蒙憲臺遣標下守戎王捷督查其工又蒙廉察壩草六十一萬不無侵漁特對半減免三十萬有餘民間有田一分

舊例納草四十八束者今止納二十四束以是寧民  
踴躍趨事爭先恐後各渠疏通無阻泮岍又極堅固  
所以立夏開水之日黃河水不加增而每年開水月  
餘水不能到稍者今不過四五日稍末卽澆灌徧足  
矣鎮城以北往年不沾涓滴者今且徧種稻稗矣寧  
鎮各渠之情形及修濬之利弊如此此皆憲臺標下  
守戎王捷所目擊者也獨是職全革弊太盡立法太  
嚴委管渠長盡遭革除豪衿地棍勢難包折隱射之  
弊俱爲清出枝渠之夫不能分肥而奸胥滑吏歲歲

恃渠工以填谿壑者今且無所施其巧是數萬生靈  
雖云受利而積年奸宄未免側目矣竊思古人之於  
渠務額設有夫力役有期物料有備分五工分八段  
使各盡其力立法何嘗不善迄於今非徒無益而又  
害之總皆趨利之輩作弊於所忽壞法於不覺竟使  
利民者反以累民古人立法之美意泯沒殆盡職全  
亦何人斯安保其所立之法不卽壞於旋踵也耶伏  
祈嚴飭司水利者每年以去歲春工爲例而再爲神  
明變通於其間不使已效之法復致更張已通之渠

復致淤塞憲恩直與河流並永矣緣奉鈞諭詳悉敷陳故不揣冒昧瑣屑妄瀆并繪具渠圖呈電伏惟俯賜詳察職全幸甚地方幸甚

公諱全臣字仲山楚郢名進士也性情才學儼然古之醇儒所上舒撫軍一書立德立言立功均堪不朽說者謂天憐吾寧特令公來補漢唐未竟之業且爲渠工立百世不易之法也其信然歟士民之壽諸石也固宜七十二老人張瑞隆謹跋

### 渠圖弁言

天下郡縣所在莫不有圖然所爲圖者率皆委諸畫工塗以丹青其爲用也不過贄呈上官苟應故事已耳寧夏地界沙漠民以渠水爲命圖較他處爲詳有心斯民者往往於寧圖三致意焉匪爲圖也凡以爲渠也今日之渠豈猶是昔日之渠也哉昔渠有二而今得三昔共傳唐漢而今兼頌大清使仍命畫工圖之則依稀彷彿莫能辨厥形勢詳厥源流其不爲覆瓿之具者幾何矣我司馬王公蓋新開大清渠者也

渠成則繪之以圖圖就則鐫之以石則見夫兩山相峙滔滔出峽者黃河也河之濱支分一派西行以達於田間者唐渠也河之中長堤百丈截流而挽之西趨者公所築唐渠迎水泮也唐之下三十里又一派支分者漢渠也漢之上漾漾灑灑豁然洞開另闢一口蜿蜒七十餘里折而歸於唐渠者公所開大清渠也渠之內新亭傑出與漢唐鼎峙望之如蓬萊三島者公所修大清閘壩也閘之後斷虹偃卧琮琤瑩瑩駕清渠而飛渡者公所作過水笕也斗口鱗次村堡

星分而湯湯洋洋無畦不入公之所開大清渠以助唐渠且以裕漢渠也今而後何者宜修何者宜築何者宜疏濬導引披斯圖也瞭若指掌興水利而罔替實以此爲嚆矢然則斯圖所關綦重矣苟應故事云乎哉公以余言爲簡盡命弁諸石余曰諾時康熙庚寅季春之吉西夏李蕢謹識



書渠圖後

予以戊子春蒞寧夏值渠工方興故事集紳士議渠盈庭聚訟各執其是索觀其圖則畫工所繪形勢茫然夫寧政惟渠務爲最重奈何率略其圖也予固疑所議皆臆度矣迨徧歷漢唐體察形勢乃知漢之病以唐分其潤唐則病於口之無唇咽喉之不利且腹大身長力難充周向者何未議及也爰告紳士欲於唐之下開一渠以助其力欲於唐之口築一湃以補其唇議者皆謂事必難成卽成矣亦無濟辨爭之餘

且滋阻撓予矯而行之幸數十里之渠以開數百丈  
之泮亦竣因勢乘便更爲利厥咽喉河流直入徧滿  
田間向之阻者且稱頌以爲神嗚呼亦何神之有水  
則順其性工則覈其實如是焉而已矣然惟胸有全  
圖故敢矯衆議而獨行也於是繪胸中之圖鐫之於  
石非敢以示後人聊用佐議渠者之談柄云爾康熙  
庚寅春月王全臣書

### 重修暗洞記

渠之有暗洞也古所設以洩水者也河流自南而北  
各渠引之西北行以溉民田溉田之餘水散注於各  
湖湖與湖遞相注而仍東洩於河其所由洩之路則  
穿漢渠之底而出漢渠南北流於上而穴其下若橋  
洞然雖高止數尺廣止丈餘而渠與兩岍之堤寬至  
十有餘丈洞之長亦如之深藏地中潛渡伏流望之  
幽邃杳冥故曰暗洞也厥洞惟三在魏信堡者曰上  
洞在張政堡者曰中洞在王澄堡者曰下洞古人之

於渠工計其蓄復計其洩良法美意亦至詳且盡矣  
予蒞寧之初巡歷郊原第見夫各渠率多壅塞民田  
強半荒蕪每經過暗洞或告子曰水滿則溢此乃洩  
之也予雖目擊其崩潰填淤忽焉不介於心蓋環顧  
阡陌之間求涓滴以潤涸轍尚憂憂乎難之焉用洩  
爲意謂古人爲此似亦過計迨其後創開新渠疏通  
唐漢水於是乎有餘田間水滿乃注於各湖湖不能  
容遂溢而爲害夫乃嘆古人之良法美意皆毀於後  
之人之忽不究心耳嗚乎靡不有初鮮克有終伊誰

之咎歟苟不早爲之所倘一傾頽漢渠且截然中斷  
奚可哉乃日夜思所以修葺之無如工大費繁計無  
所出未敢遽宣諸口辛卯冬

詔蠲次年租賦予欣然曰暗洞可修矣正供中有所謂  
麥饌者歲賦七百餘金往例不賦之於丁地而賦之  
於渠夫每歲於額夫萬有二千之中輪抽五百人免  
其力役俾納麥饌今租賦旣蠲則此五百人者例仍  
歸諸渠向者渠工浩大尚可少此五百人茲渠已垂  
成又焉用之竟以之助修暗洞可也張政之洞原甃

石爲之第歲久欹損耳魏信王澄較張政之洞爲更大乃盡係木植易於敝壞若俱易之以石更足垂諸久遠爰綜覈而量度之三洞之中爲補葺爲更易應用石幾何木幾何灰草幾何工匠幾何會計既定乃卽壬辰春濬之先於麥饌五百人中以三百人措置一切物料以二百人採石於山示以尺寸而檢罰去歲春工之悞工者數百人使運之其或不足則酌撥額夫以助之罰工惟重他則較濬渠稍輕蓋使小民易於趨事也春濬工興衆役畢集不越月而告成魏

信王澄之間偉然兩石洞直與在張政者並垂諸久遠矣由是於各湖上下水所由行之路盡疏之使通以導其流夏秋之際田間水滿如故而各湖之濱且涸而爲田泛溢之害吾知免矣古人之制可復予亦可告無罪矣或曰不費不勞而使水有所蓄復有所洩皆司馬之功也或曰水利自有專司君何越俎以任勞怨且不憚煩耶嗟乎今日暗洞修而渠之事功始備予之志願乃畢予何功焉特復古制云爾若夫身任民牧則民事宜亟越俎之譏予固不辭也後之

君子實用心於蓄洩之間而不使古人之良法美意  
湮沒於忽不究心者流斯予之願也已康熙壬辰仲  
秋王全臣記

大清渠錄

司馬王仲山新渠告成邀余開水喜而有作

鞠宸咨

兩壩中間勢可疏年年對此獨躊躇計工奚止增千  
百董事難將任吏胥畚鍤纔聞過蔣鼎堡名新渠  
經由於此波  
濤倏報會唐渠沿途童叟爭羅拜道我經營未敢居

喜二弟創開大清渠

王余臣

引得黃流入大田盈阡盈陌水涓涓馬頭父老爭相  
慶人力須知可勝天

戊子秋創開新渠號曰大清旬日之間水盈阡陌竊喜其功之倖成也賦此 王全臣

尋得河流勢可通好乘農隙便鳩工萬人力役三秋後百里渠成七日中預計支分忙父老傳聲水到走兒童餘波更足資唐漢處處應看歲事豐

大清閘落成

二首

王全臣

予於唐漢兩渠之間增開一渠蓋助兩渠水力也 觀察使鞠公達之 舒大中丞命予建正閘一退水閘三造橋房置旗亭規模彷彿

唐漢而閘後又作木笕以渡他水風景更有可觀爰作長句以紀之

規模直與漢唐同甃石浮杠落彩虹遠近縈紆分上下縱橫挹注任西東惟知順水行無事敢謂開渠輒有功最是亭成臨孔道喜聞過客話年豐

順瀛洪河入地中漢唐得助益沖澗羣氓久食千秋利此日新添一漑功沙際堤環春草綠橋頭額映晚霞紅閒來徙倚虛亭下翻愛旁流笕向東

寧夏王司馬仲山創建大清閘告成邀涂子聽

菴與余同遊分得鄉字

李蘇

疏鑿千秋紀漢唐誰通一脉出中央兩渠更見波濤  
壯九堡先聞黍稷香笕枕石梁虹截雨亭飛沙漠水  
爲鄉行行羣擬遊三島不信蓬瀛在朔方

同李環溪遊大清閘分得浮字 涂志遇

淹歲銀川此漫遊黃沙捲地不成秋只將九曲源源  
引便看餘波處處流笕水高依橋上過旗亭直擬浪  
中浮漢唐鼎峙遙相接禾黍盈盈一望收

同涂聽菴李環溪遊閘上戲分田塍二韻

王全臣

爲惜膏腴等石田聊因就下引涓涓渠開荒野資羣  
力橋鎖奔湍效往賢灌溉纔周千頃地氤氳蚤動萬  
家烟旁流復瀟闌干外錯綜高仞景亦妍

渠成水到瀉雲塍卽看農工處處興喜動兩河觀察  
使事聞分陝大中丞殷勤命作千秋計措置欣逢比  
歲登亭榭橋梁齊就緒須知終始有師承

題大清閘

鞠宸咨

新渠水會舊渠流愧煞當年築舍謀此日憑臨亭子

上渾如渡客濟輕舟

過大清閘呈王司馬

范時捷

亭臺四面水為隣唐漢中間結構新自昔兩渠開朔  
漠而今三閘峙河津西流筧引東行巧百里功成七  
日神聞道鳩工如振旅好將方略示同人

過大清閘

有引

三蘭遊脚

唐喉哽咽灌溉難周此地嘆無禾久矣今旁  
通曲引溝澮皆盈且亭臺閘壩忽如天上飛  
來何成功之速也吁易礪确而為沃壤伊誰

之力歟用是疥壁以望後來作者

一望平沙總不毛當途底事置勞勞忽聞河轉支流  
急漸看額橫斜照高牧豎行歌皆擊壤遊人攬勝足  
揮毫神工更巧憑剝木西控長鯨跨巨鰲

道人不知何許人詩既豪邁字亦飛舞翫之渾  
無烟火氣守丁謂其丰致飄逸到閘上徘徊四  
顧出囊中筆墨掀髯微笑題壁而去噫此固非  
漫遊方外者也讀序語又似熟遊斯地者何竟  
不留姓字於人間耶貌其形似摹之於石用誌  
景慕之意云王全臣識

大清閘

閘後更造木筧狀如車箱引唐渠支流  
飛渡檻外上下縱橫水聲相亂竟足供  
人遊覽云

王余臣



百里渠成利已周更橫木笕傍橋浮縈紆直使千郊  
潤上下俄驚十字流畫棟巢新栖海燕盤渦波緩信  
沙鷗我歸圖與高堂看應一開顏爲點頭

迎水堤

仲弟於青銅峽內疊石爲堤障河流以入唐渠萬頃波中綿延數里亦巨觀也

王余臣

疊石嶙峋破碧天平分巨浪滙山前半邀出塞黃河  
水徧瀉荒郊斥鹵田漫擬鯨橫星宿海直疑虹駕斗  
牛邊漢唐閘壩高千古敢謂區區踵昔賢

唐渠口迎水堤告成

二首

王全臣

欲引滔滔用不窮先將百丈築河中頻移巨石填包  
匭頓使天吳徙水宮白塔磯前標砥柱青銅峽內卧  
長虹從今萬頃桑麻足可是區區一障功

洪流出峽走奔雷一道長堤築水隈祇爲磯頭排浪  
去漫將人力挽他回雪濤卽看層層入田鼓應聞處  
處催利導曾無奇異策惟教渠口有唇腮

司馬仲山大清閘迎水堤先後落成予與寧民  
安享其利爰紀始終六絕句人曰公亦與有  
力焉則吾豈敢

王應龍

古壩稱唐漢寧民受利多一從河勢改相望任蹉跎

其二

我來肩此任疏濬兩無成賴有賢司馬殷勤爲我營

其三

程工師井地動衆趁農閒旬日何曾滿渠開兩壩間

其四

更於唐口外纍石築長堤百丈迎銅峽奔湍早向西

其五

渠成堤築後次第構亭臺恍擬行三峽濤聲逐耳來

其六

俵封隨所憇長短有郵亭禾黍高低綠蘭峰分外青

遊大清閘

王惠民

寧人議開此渠久矣予曾承委勘厥形勢以工大費繁兼阻之者衆竟成築舍之謀仲山蒞寧未幾渠開閘建若行所無事者然予喜其功之不啻已出也漫成一絕

昔年曾此審源流遺憾工繁願未酬今見規模同兩壩賞心殊異等閒遊

予於靈武渠工不遺餘力今至銀川觀仲山所建大清閘規模宏敞與漢唐並峙慨然有作

祖良正

年年我亦濬秦渠地洞纔通興自如今日行來新開  
上始知未讀水經書靈渠有地洞予疏之乃得水

過大清閘

李山

每于秦漢

靈武二渠名

閱春工遙望唐來

唐渠名

一葦通久

嘆膏腴成草莽誰將亭榭駕電虹村村烟鎖垂楊綠  
處處波搖晚照紅今日偶從清閘過共傳疏濬屬王  
公

抵寧夏過王司馬大清閘

索柱

仗節理西彝驅車赴寧夏行行抵漢唐云胡三閘壩  
父老爲我言此是新開汭唐口久淤塞疏濬等築舍  
欣逢王公來獨行不旁借七日新渠成次第修臺榭  
東西水難通更將木笕架黍谷頓生春高仞紛穰稴  
閘遵

聖朝名直與漢唐駕我聞三嘆息攬轡看奔瀉水以無  
事行人於所過化功存賀蘭間澤垂百世下何日同  
公遊臨流酌公竿

絕句三首呈王司馬

莽鷓立

白塔山前水向東唐渠疏濬總無功王公妙有蘇公  
法一道長堤築浪中 迎水堤

兩渠相望抱新渠處處歡呼水有餘聞道功成剛七  
日此中經濟是何如 大清渠

巧奪天工一筧橫高低喜聽叱牛聲亭臺閘壩同唐  
漢不愧標題號大清 大清閘

過大清閘 有序

李光輔

輔家世靖魯居近黃河所引以灌田園者惟  
桔槔是賴吁視寧夏唐漢之受水其勞逸大

小不啻鼯鼠爲飲矣議者欲開渠溉古城地  
千頃官民皆難之茲見吾師於唐漢之中增  
開大清渠一道逶迤七十餘里不旬日而工  
竣過斯渠也寧無吾土之慨耶

烏蘭高與賀蘭侔家住黃河最上游自喜涓涓隨轂  
輓誰能浩浩遍田疇滄桑勢變唐非舊疏濬功宏漢  
亦秋安得吾師過靖魯恩波爲注古城頭

大清渠橋亭落成爲仲山先生賦

宋振譽

春濬工將畢橋亭喜落成棠陰歌太守榜額屬狂生  
大清開額字  
爲余所書唐漢分三派桑麻潤九城欲知民樂利  
波上數鷗輕

其二

匠心君獨運結構面諸峰

橋旁另構別業峽  
口諸山俱在目前

眺望供

遊客耕耘慰老農平沙飛白鷺斷岬卧蒼龍得暇頻  
來此臨流任倚筇

經大清開口占

孫王法

小憇旗亭四面涼三三兩兩頌黃堂而今開得清渠

水不似當年藉漢唐

其二

頻年于役向金城此處曾無澎湃聲誰引黃河流大  
地高低喜見綠波盈

其三

亭臺新葺漢唐間挽得洪流去復還草色青青環九  
堡餘波更繞賀蘭山

庚寅春予來司寧夏水利讀王君仲山上舒撫  
軍書載渠工利弊甚悉迨巡歷漢唐觀迎水

堤閱大清渠規畫周詳治渠之能事備矣予  
坐守其成賦此誌幸

貝廷樞

初司水利總茫然漫讀渠工書一篇只道敷陳皆故  
事誰知疏鑿在當前長堤百丈橫銅峽一口中開湧  
沸泉自幸無才多厚福行來到處遇名賢

遊大清閘

王會臣

聞說新渠媿漢唐家書屢讀擬尋常今看傑構同瑤  
島更愛殘虹駕石梁夾道依依楊柳綠盈疇脈脈稻  
花香農夫備述功成易七日能開百里長

庚寅春至朔方閱二兄所開大清渠蜿蜒數十  
里可灌田千餘頃其閘壩竟鼎峙漢唐卽此  
可爲吾家治譜矣敬成一律

王念臣

少小繙經識賀蘭天涯遠擬不毛看寧知畊鑿同中  
土誰道瓊裘近可汗兩壩原沾唐漢澤新渠今接斗  
牛寒他年我亦膺民社吏治如兄愧弟難

大清閘

王介臣

新渠婉轉抱青疇瘠壤于今槩有秋偏是遊人來閘  
上獨驚飛笕渡旁流

迎水堤

王个臣

河流東北注渠口傍西開不藉堤爲障焉將勢挽回  
逆迎銅峽去順受雪濤來賈客操舟過應疑鯨吐腮  
庚寅春郊遊見家嚴大清閘並迎水堤敬賦

王世圭

春風一路鳥頻啼遠近炊烟望欲迷閘壩川分增蓄  
洩亭臺鼎峙互高低截流旁注憑飛笕拔浪中橫倩  
障堤共道當年唐口塞而今滾滾到城西

大清閘

王式琬

動衆三秋後開渠百里長環郊田井井到處水洋洋  
閘壩司吞吐亭臺峙漢唐經營曾幾日事業見遐荒  
迎水堤

王式琬

河勢嗟東徙迎流妙有權堤身遙指峽人力竟回天  
餘潤村村足迴波處處圓晚烟看橫截兩水浴嬋娟  
過大清閘

劉追儉

莫謂神功屬混茫憑將疏鑿闢榛荒漢唐渠外添溝  
澮沙積灘頭樂井疆亭帶溪流山入座瀑飛笕道水  
翻梁我來下馬還瞻眺牧笛聲聲弄夕陽

近體一首書王司馬渠圖碑陰後

朱軾

奔騰浩瀚出毫端唐漢新渠次第安三閘平分均水力長堤突兀挽狂瀾城依東壁知靈武雲鎖西山識賀蘭自是韓陵石一片行人莫作畫圖看

同宋佩劬觀王司馬渠圖

孫王法

山自高兮水自深新渠舊壩好追尋勸君入眼無容易一寸工夫一寸心

辛卯夏予請假歸里見唐漢之間新增一渠閘

壩傑出其唐口更築迎水堤數里皆司馬王公之功也詩以紀之

師懿德

幾載重過百塔濱垂楊夾道曉烟勻亭臺忽見開三閘疏濬驚傳未一旬笮卧橋頭縈巧思堤橫唐口吐長唇年來愧我勞王事誰意田園處處春

朔方行爲司馬仲山先生賦

程鵬

濟世須豪傑庸庸尸位多有懷莫獲展亦與庸同科往古來今皆坐此乾坤建豎曾幾何銀川自古連沙漠惟資渠水灌田禾年來河勢向東徙唐口高懸起



慢坡口渴喉乾腹自燥百肢血枯脉不和王公醫國  
手妙術邁華陀按脉診視尋病源尋得病源在中阿  
因時以動衆力役無煩苛九堡最先沾樂利七日頓  
教起沉疴堤築長鯨迎雪浪笕吐殘虹駕石鼉急沫  
拋魚尺新柳擲鶯梭我聞古渠僅漢唐豈意新渠滙  
洪波家家喜傾穰田酒處處遙聞擊壤歌可知治水  
無奇策禹驅巨靈亦傳訛直使塞北勝江南屢過遊  
亭費揣摩丈夫得展平生志功業炳炳壯山河君不  
見賀蘭蠹蠹鬱嗟峨黃河滾滾轉盤渦公之新渠白

練拖唐漢中間常不磨

古體四十八韻呈司馬仲山先生

有序

寧渠之有漢唐古也漢唐中之有大清非古  
也予過而異之畊者輟畊告予曰茲渠也蓋  
王公見唐口壅淤河勢遷徙開此以益唐而  
掖漢者也公開渠僅七日築泮踰百丈其亭  
臺閘壩不旋踵而先後告成一若神輸鬼運  
者功成之日吾儕受公澤而莫名欲以王公  
名諸亭公惟不自居也爰名之以大清予聞

之第以古人求之而不謂於東川別墅得親  
炙之迴憶讀公之文復何幸覩公之行也吁  
吾人學古入官不當如是耶以儒術爲經濟  
殆所謂正其誼不謀其利明其道不計其功  
者歟詩以紀之

謝鴻

古之從政者學而優則仕文章闡道德經綸本書史  
隨事有措施國賴而民倚嗚乎非吾徒何足以語此  
王公命世才荆楚名進士斯文之模範宗廟之簠簋  
初試牧野間再試大夏水在在多異績十奇難盡美

銀夏古朔方景物江南擬舊有漢唐渠湯湯與瀾瀾  
唐口久淤塞河勢向東徙挹分漢餘瀝婦子嗟懸耜  
譬彼患蹙者一肢已枯死依人千里行夔跚日積跬  
又若續鳧脛截鶴以爲累鶴鳧兩不完吁嗟愚極矣  
底事久因循勢阻於角犄咄哉此邦人築舍徒虛爾  
我公心憂傷饑溺引已恥唐水欲遠長賀蘭擴小泚  
唯形審勢度不氣使才恃紆折全坵墓繞道環廬里  
計土以授夫因臂而使指積弊盡釐剔奸胥嗟窮技  
七日告厥成大清渠名始開壩次第修屹然相表裏

更於唐口上移石填包甌築堤巨浪中儼若蛟龍起  
挽水向西來滔滔足耘耔一朝善規畫萬世樂秬秠  
君子頌神功隨山刊木比小人沐厚澤戶祝與家祀  
恒情際斯時詡詡竊矜喜公以名歸

國臣心仍坎止吾偶客邊陲飲馬南塘泚懷古弔汾陽  
元昊臺拖履英雄氣槩盡曾不掛人齒填街滿口碑  
惟頌奇男子少讀公之文私幸窺形似今復覩壯猶  
欣得鳳凰髓曾過寓書齋忻忻忘倒屣式玉而式金  
愧彼肉食鄙逆旅吳下蒙笑傲任跣弛長揖一醉別

緣慳再御李我

皇極聖明宵旰謀國是會須虛前席勞公爲聚米經濟  
本儒術今古同一理爰作紀事謠用以代蒿矢

辛卯歲再至朔方晤仲山先生辱示上舒撫軍  
渠務書並大清閘迎水堤諸詩受而讀之固  
知儒者經濟自是不同爰作長句以附諸公  
之後  
上官法

去年杏花籠春霧匹馬大壩小壩路處處酒帘趁柳  
風側耳歡聲歌來暮試問使君政何如屈指爲言下

車初宜民善政難悉數第一獨創大清渠慨彼漢唐  
兩渠次數十年來失水利五工八段負濬名歲歲春  
工等兒戲稍之不受口不通渠中沙積隱隆隆包折  
夫草人橫踞誰其剔弊奏豐功公之來也深慮此相  
度形勢走百里了然成竹布胸中力排衆議成獨是  
不因開鑿毀墓田不煩科歛擾炊烟因其原夫度以  
土計日量工董之焉高者下之狹者廣唐口更築堤  
百丈引得黃河萬派通到處磽确成沃壤雁排雲漢  
一天秋千年水利七日收有如旱濟及時雨更如甘

蔗潤渴喉衆論紛囂一時息諸堡欣欣有喜色此水  
之利利十千比歲而登賴茲力我聞此語緩轡行盪  
胸豁眼長橋橫滔滔波逐兩渠去邁漢逾唐號大清  
今歲西成復流寓場圃滯穗遺無數東川別墅挹德  
輝消我鄙吝黃叔度讀君所上中丞書經濟文章綽  
有餘浩蕩恩波垂百世名不沾兮功不居余也盱江  
一草野走筆而歌愧風雅君家世德本三槐會見甘  
霖遍天下

過大清閘

俞益謨

唐漢平分萬里流中添一道入青疇沿堤柳浪村村  
密刺水秧針處處稠長笕濤翻橋闌外虛亭額映塞  
垣秋春風策馬頻來往幾度低回去復留

大清渠

馬見伯

滔滔飛白浪曲曲引黃流並勢三渠下分行九堡周  
波紋隨鷺戲藻帶任魚遊從此溪田內恒書大有秋

其二

一望自汪洋恩膏徧朔方是田維秬秠無稼不茨梁  
帝載洵熙也天工允代將爲民兼爲國功德水流長

漢渠之下舊有三暗洞洩各渠餘水歲久浸廢

子重爲修葺且易以石夏秋之交竟免泛濫

詩以紀之

王全臣

河流分瀉漢唐中並拖白練如雙虹唐來

唐渠名

西繞

蘭山麓漢延

漢渠名

綿亘唐之東中間萬頃紛挐注餘

波總向湖中聚羣湖婉轉東歸河漢延堤高截去路  
古人立法妙有餘地底鑽穴透漢渠就下能消羣湖  
水彷彿滄溟洩尾閭慨自河遷唐口咽蓄之烏有焉  
用洩縱然古洞迹猶存一任泥沙久埋滅大清渠開

水洋洋迎水堤成勢更狂田間水滿翻爲虐到處泛  
溢嗟懷裏尋得古洞皆木植支撐渠庖苦無力經營  
石磬洞惟三奧若蛟宮不可測石梁潛架遂且幽堅  
牢穩載漢渠流任他灌溉盈溝澮暗把狂瀾細細收  
老農欣喜相告年來鳴蛙產釜竈三洞賴我使君  
修夏不早兮秋不澇曾聞河源來自天一曲伏流路  
幾千可是天吳聊小試暫移鱗穴到銀川紛紛行客  
頻過此驚看渠底水瀾瀾道是策馬歷東陽一派宮  
商清人耳使君政暇可郊行洞側清涼好駐旌爲聽

澶涿河中去盡是三渠擊壤聲予也聞之深愧謝功  
以倖成勞獎借開渠修洞踵先賢但願歲歲宜禾稼

過暗洞口號

涂志遇

只道羣湖海樣寬何堪泛溢肆狂瀾而今洩洩由三  
洞昏墊無嗟萬井安

過暗洞有作

王余臣

禾黍高低水滿渠倉箱有慶樂徐徐只圖九曲耒星  
渚未解百川歸尾閭泛濫于今明蓄洩潛消自昔有  
乘除經營木石成三洞爲趁春工衆力紓

題暗洞

劉追儉

渠上滔滔巨浪春更看渠下走潛龍  
噲吹下上聲相應疑是山行到石鐘

其二

可但清音到耳邊回眸滄海已桑田  
須知絕勝桃源洞洞裏人家別有天

暗洞

王世圭

每值秋風萬寶成羣湖汎處水驕橫  
尋將古洞重修聳共聽安瀾日夜聲

暗洞

王式琬

渠底驚看駕石梁縱橫上下水湯湯  
從今蓄洩隨人意歲頌千倉與萬箱

壬辰二月予抵水利任甫數日遂值春濬聞仲  
山王司馬數年來盡力渠務毫無遺憾卽今  
春撥夫派工皆蚤已部署妥帖子督濬至大  
清聞見規模壯麗喜而有作 喬育正

大清額字耀坊頭溝洫勤勞事事周  
筭吐長虹飛碧落堤拖素練入青疇  
渠西脉引渠東注橋上波同橋

下流唐漢更聞都暢達我來私幸有成謀

題大清渠二首

蔡升元

爲憐膏壤棄邊荒七日功成百里塘引入河流砂磧  
裏鑿開峽口賀蘭旁支分九堡通溝澮鼎峙三渠並  
漢唐作吏盡如君任事不難到處樂豐穰

兩渠中劃大清渠畚築無勞民力紆心畫萬家溝洫  
志胸藏一卷水經書嵐光樹色晴川外鴻影鷗波夕  
照餘渾似江南好風景豈惟灌溉徧村墟

過大清閘橋亭再賦

蔡升元

楊柳亭臺楚楚小橋流水湯湯此日郁膏芑黍他年  
召蔭甘棠

過大清閘口占

吳應正

唐漢經營水脉通又看疏濬出神工兩渠總匯中條  
內七日俄成萬世功禾黍紛翻紅穰稷亭臺俯浸碧  
玲瓏堤邊更植千株柳底羨棠陰說召公

題大清閘

張文煥

環郊一望柳參參夾道陰濃湧翠嵐唐漢千秋渠是  
兩蓬瀛此日島爲三觀成屢有豐年慶圖始誰將重



任擔更築蘇堤迎峽口直教勝槩擬江南

司馬王公邀飲大清渠上見所創閘壩亭臺直

與漢唐並麗歡遊竟日賦此 杜 森

亭臺迥出漢唐間洞啓軒窓解客顏曲折遙分銅峽  
水青葱直挹賀蘭山欣遊樂土拚同醉坐到斜陽未  
肯還岍嶂高吟推謝奕須知政暇有餘閒

大清閘

溫如珪

蘭峰插天青黃流環其麓灌溉盈田疇歡聲動比屋  
人皆爲我言惠邀王公福唐口水逝東公將長堤築

更於唐漢間闢新開溝瀆九堡澤先周會歸唐渠腹  
閘壩倣漢唐橫笕渡飛瀑以是屢豐年無庸豚蹄祝  
余也備邊戎幸共雲龍逐亭上久徘徊江南恍在目  
庚癸杳無聞刁斗不煩肅匪特婦子寧卒旅借安燠  
題壁盡珠璣往來頻誦讀我欲揚豐功徒慚貂尾續

呈王仲山先生絕句四首有引 秦弘曆

銀川古朔方地厥土斥鹵必藉潤於河流唐  
漢兩渠居人久食其利自河勢東徙唐則病  
於口之無可容漢則病於唐之分其潤數百

里之沃壤幾嘆無禾矣曆久客關隴熟聞

司馬王老先生新創大清渠所以益唐掖漢  
利濟寧民者規畫至詳且善輒自恨未能履  
其地目覩其形似也甲午夏策蹇過之見夫  
綠稼盈眸黃流聒耳其間亭臺閘壩竟鼎峙  
漢唐噫經濟本乎儒術安在古今人不相及  
耶漫成四絕句愧未能工聊以作紀事之謠

云爾

百里新渠七日成高低禾黍水盈盈創垂自昔稱唐

漢補救于今得大清大清渠

忽驚飛笕吐長虹巧引西流復向東小憇橋亭頻眺

望此中兼有濟川功大清閘

青銅峽口塔山隈河勢東遷去不同一道長堤標砥

柱挽他餘潤入唐來迎水泮

塞外西風起暮愁羣湖泛濫不成秋年來修葺尋三  
洞野水無聲暗地收暗洞

國



